

IN FUNERE
CAROLI VI.

ROMANORUM REGIS, IMPERATORIS ELECTI

ORATIO

Habita in Sacello Quirinali vi. Kal. Decembris

A D

SANCTISSIMUM DOMINUM NOSTRUM

BENEDICTUM XIV.

PONT. MAX.

A

JOHANNE CAROLO BOSCHI

Ab intimo Pontificio Cubiculo.

THE UNIVERSITY OF CHICAGO

PHYSICS DEPARTMENT


CHICAGO, ILLINOIS

1950

RECEIVED

(III)

BEATISSIME PATER.




ELATUM *mibi a* SAN-
CTITATE TUA *præcla-*

*rissimi Imperatoris laudandi munus , hac
Oratione implere , pro virium mearum
imbecillitate , conatus sum , quam in
ipsa funeris celebritate , benignissime au-*

*diente Te, dictam, nunc typis excusam
 Tibi sisto consecroque. Hæc autem non
 ideo in publicum prodit, quod ego eam
 aut argumenti dignitati satis responden-
 tem, aut Tuo nomine auspicioque di-
 gnam, vel etiam acri & censorio judicio
 parem esse, mihi persuadeam: Sed quia
 extremum hoc pietatis officium meritissi-
 mi Principis memoriæ, tuo jussu, tribu-
 tum, pervulgari, atque omnibus testatum
 esse, SANCTITATI TUÆ non ingra-
 tum fore judicavi.*



ORATIO.



IN funere augusti, invicti, religiosissimi principis, CAROLI VI. Romanorum Imperatoris electi, Germaniæ, Hispaniæ, Hungariæ, Bohemiæ Regis, BEATISSIME PATER, non ego me communi mœstitiæ solatium ullum dicendo allaturum confido. Quis enim maximum hunc, justissimumque dolorem aut eloquentiæ vi mollire, aut rationibus minuere se posse speret? Video Imperium florentissimum suo moderatore repente orbatum: complura Regna, ac nobilissimas Provincias longe lateque dispersas, Austriacæ gentis dominatione jampridem felicissimas, nunc eam tot heroum, tot regum stirpem, exspectata nequicquam virili sobole, in uno capite excisam lugentes: video Christianam, rempublicam hoc validissimo propugnaculo, quod unum contra Turcarum tyrannidem objicere jamdiu consueverat, intempestivo casu destitutam: Europam omnem maximas turbas, rerum omnium subversionem, extremum denique excidium pertimescentem. Quæ quum mihi omnia ante oculos obversentur, ego ne tot lacrymas tergere, tantam luctus acerbiteriam

solari aggrediar? Tu ipse, BEATISSIME PATER, hujus inopinatae calamitatis accepto nuncio, obortis lacrymis, statim in genua procumbens, nescio an parem tanto infortunio animum de Coelo postulaturus, an impendentia forsan Orbi Christiano majora damna deprecaturus, ceterorum moerorem, trepidationemque satis comprobasti. Ego vero id mihi sumam, ut hujusmodi vulnus lenire, hanc ægritudinem oratione mea levare me posse putem? Si de laudibus optimi principis aliquas commemorare instituem, nonne tristitia ex illius desiderio percepta ipsâ laudatione recrudescet? Et tamen tuæ, Pater, erga præclarissimum carissimumque filium pietati satisfaciendum est; & minime decet religiosissimi Imperatoris funus ideo sine laudatione transigere, quod ipse omnium laude dignissimus fuerit: Parendum est igitur pietati, consuetudini recte institutæ, atque ipsi justitiæ parendum; ac nonnulla de illius virtutibus dicenda sunt: quibus si minus levare poterit dolor, hoc saltem in ipso dolore miserum ac triste solatium capiemus, quod maximo jure lugere nos, omnibus comprobabimus.

Si mihi liceret Imperatoris Caroli vitæ, quamvis heu non ad senectam productæ, partes omnes atque ætates oratione percurrere, atque singula ab ipso fortiter, strenue, prudenterque facta commemorare, facile omnes optimi principis dotes in eum confluisse demonstrarem. Sive enim maxima bella, non solum ejus auspicio, sed etiam ipsius ductu atque imperio gesta proponerem; sive providentissimas leges judiciorum æquitati ac populorum regimini constitutas; seu denique, totius temporis, quo Romanum Imperium, atque avitæ conditionis Provincias rexit, historiam pertexendo, sapientissimam reipublicæ administrationem explicarem; paucos admodum principes pacis bellicque artibus æque-

cla-

claruisse , ostendere possem . Sed quoniam & temporis angustia id minime ferunt , & sanctissimi Ecclesiæ Pastoris , atque amplissimorum Religionis antistitum præsentia me admonet , ut ea potissimum dicendo persequar , quæ in Christianissimo Imperatore ad religionis ac pietatis memoriam clara atque insignia fuerunt ; plurima laudis argumenta relinquam , quæ nihilo minus recordationi hominum atque historiæ concredita , tanti principis gloriam immortalitati commendabunt .

Non eodem modo de principibus viris Ecclesia judicat , ac reliquum hominum vulgus . Hi etenim humanam gloriam , opes , potentiam , delicias , maximo in pretio habentes , eos ex omni hominum numero beatissimos putant , qui hujusmodi bonis abunde circumfluunt , eos colunt , atque suspiciunt , penes quos illorum arbitrium ac potestatem esse demirantur . Longe alia Ecclesiæ , coelestis Magistri doctrina edoctæ , sententia manet . Quod enim iis rebus , erga quas mortalium cupiditas fertur , principes potissimum affluent , id nullo iis bono , sed maximo periculo , atque ad veram beatitudinem assequendam impedimento , esse ducit . Sed si quis eorum , ex hujusmodi laqueis emergens , vitæ suæ rationem ad Christianæ institutionis normam constanter dirigit , hunc felicissimum judicat , hunc sapientissimum prædicat , hunc fortissimum merito appellat ; qui hostes non modo propria singulorum vi ac ferocitate timendos , sed facto veluti agminè in suam perniciem conspirantes prostraverit atque devicerit .

Quæ quum ita sint , BEATISSIME PATER , ecquem in omni historia principem reperiemus , cui non maximarum virtutum laude Carolus VI. Imperator comparari possit ? Qui ab ipso ineuntis ætatis principio maximi regni possessionem adeptus , atque in summo humanarum rerum fastigio collocatus , omnia cupiditatum

irritamenta, quibus ea conditio, atque illa ætas sollicitatur, animi virtute superavit, ac totum juventæ cursum caste integreque transegit. A deliciis vero semper ac voluptatibus longissime abfuit; neque alia animo levando quæsit oblectamenta, quam quæ aut corpus honesta exercitatione obfirmarent, aut mentem utilibus ac liberalibus disciplinis instruerent. Quæ quidem ex re fructum uberrimum ac præstantissimum cepit. Ita enim & in arduis belli laboribus tolerandis, periculisque adeundis, (in quo se cuilibet gregario militi socium, immo exemplar sæpe præbuit,) patientissimi semper corporis viribus usus est: & in sustinendis maximi Imperii curis, non solum præsentiam animi, ac sedulam semper vigilantiam præstare non detrectavit; sed ipse de publicis rebus assidue meditari, atque optimas explicandis negotiis rationes invenire per se potuit, easque consiliorum suorum, ac rerum gerendarum administris præscribere consuevit: Ita ut omnia, quæ ejus imperium erat, non tam illius nomine, quam ex illius sententia, atque ejus auctoritate & consilio gererentur. Tantum scilicet corporis animique robur, nunquam enervata integerrimæ vitæ morumque severitate sibi comparavit.

Ac ne ipsum quidem sapientissimi Imperatoris otium expers unquam fuit honestatis, ac laudis. Quod enim tempus a gravioribus curis vacuum illi fuit, id litteratorum hominum colloquiis, ac præstantiorum doctrinarum studiis tribuere in deliciis habuit. Ex quo quidem principis amore, mirum quanta ad humaniores artes, disciplinasque omnes utilitas venit. Sublevata Imperiali munificentia doctorum virorum egestas: conquisita undique atque asservata Romanæ, Græcæ, Hetruscæ antiquitatis monumenta: Vindobonensis Bibliotheca infinita Librorum ac MSS. Codicum accessione locupletata, atque studiorum ac studiosorum omnium com-

commodis patefacta. Quod si humilioris fortunæ hominum singularis laus est, animum abducere a pravis cupiditatibus, quibus explendis ut plurimum facultas deest, seque ad virtutis, doctrinæque studia convertere; quid dicendum de maximo rege, qui contemptis circumfidentium atque avocantium voluptatum blanditiis, solidam, ac viro principe dignam sapientiam consecutus est?

Neque vero hujusmodi voluptatum fuga asperæ cujusdam ac rudis naturæ vitio tribuenda est, quæ illas non consilio ac judicio a se averteret, sed præ superbia atque imperandi libidine, relinqueret potius, atque aspernaretur. Quid enim Carolo Cæsare in omni vita humanius aut lenius fuit? Quis majori benignitate & clementia imperium temperavit? Quis unquam jus regni, per se grave atque odiosum, subditis populis suavius aut jucundius præstitit? Nihil ab eo impotenter factum, nihil acerbe dictum: nulla circa illum apparatus luxuria, præterquamquod Imperii dignitas postulare: singularis in externo cultu modestia, summa in alloquio comitas, cum majestate & gravitate conjuncta. Nimirum ita secum statuerat, ut dum Imperii, quod gerebat, & officio & dignitati satisfacisset, ceteris in rebus hominem se esse, ac sola muneris sibi commissi difficultate & gravitate reliquis præstare cogitaret. Humilis profectò, atque imbecilla mens est, quæ externis amplissimæ fortunæ splendoribus capta, neque modum tenere, neque officii meminisse valet. Sublimior atque erectior animus Carolo fuit, quippe qui aliquid ipso Imperio præstantius agnoscere fatebatur. Itaque quum nonnunquam pro oblata oportunitate aliquid ipsi agendum proponeretur, quod in illius utilitatem vergeret, fidei vero olim datæ repugnaret, in eam sæpe sententiam verba fecit: *ante se viri probi, quam Imperatoris partes*

præstare debere. O sublimis sententia! o vox, quæ totam illius animi magnitudinem una declarat. Si Philosophus, ut Platoni olim in votis fuit, reipublicæ habenas capefferet, quid unquam nobilius, quid altius ex intima Philosophia depromere posset? At quid ego Philosophiam cogito, quæ sublimibus quidem disputationibus præceptisque se in vulgus jactare, sed nihil præterea firmum & constans in animum inducere solet? Quid ex humanis artibus institutisque accipere potuit, quo se contra omnes voluptatum illecebras muniret; quo superbiam, in medio Regiæ dignitatis splendore, reprimeret; quo, supremæ dominationis comitem, impotentiam animi coerceret? Hujusmodi monstra nonnisi cœlesti virtute edomari, & conculcari possunt. *Hæc est victoria, quæ vincit mundum; Fides nostra*. Hæc animum erigit, atque in sublime tollit, eique humanarum rerum levitatem ostendit. Hæc, inquam, magnanimum Cæsarem, terrena omnia, veluti fluxa ac fragilia, despiceret, nihil, præter unam virtutem, magni facere docuit.

At non in illo *Fides* otiosa erat, quæ nihil per caritatem operaretur: Deum ex animo colere, ac venerari; supremum illi honorem publice habere; statim diei horis preces fundere; singulos solemnes per annum dies cum Ecclesia in Dei cultu traducere; hæc, atque alia plurima, quibus assidue exercebatur, religionis officia, satis evincunt, nihil illi caritate in Deum ac pietate antiquius fuisse. Talem esse oportuit, qui ingeneratam a majoribus præcipuam quamdam religionis laudem, veluti hereditate relictam, una cum Imperii gloria accepisset; in eorum vero parentum gremio educatus esset, Leopoldi, inquam, atque Eleonoræ Augg., quorum memoria perpetuo apud Ecclesiam *in benedictione erit*. Præclarum porro, admirandumque spectaculum! Maximum principem in omni pietatis officio subditis populis exemplo

plo præire ; augustissimo Dominici Corporis mysterio impensissima cultus ac religionis obsequia veteri domestico exemplo præstare ; ad aras , in Templis , in publicis supplicationibus , non tam loci dignitate , quam oculorum ac totius corporis demissione ac modestia omnibus antecellere ; Prætorianos milites , milites , inquam , in Ecclesiis silentium facere , ac debitam locis Deo dicatis venerationem exigere !

Nec solo exemplo atque auctoritate summi Numinis cultum augere ac proferre fategit . Catholicæ Fidei puritatem , qua ab ingruente hæreseos contagione immunem servavit ; qua , repressa hæreticorum audacia , defendit ; excitatis alibi Templis , Pastoribus constitutis , annuo censu attributo , amplificavit : Ecclesiæ muneribus aut dignitatibus nullos se auctore augeri voluit , nisi quos novisset doctrinæ ac probitatis laude commendatissimos : Societates Religiosorum hominum , per quos Fides ac Pietas in populis conservantur atque augentur , favore , opibus , auxilio fovit , sustentavit , adjuvit .

Quid ego hic pia & religiosa bella recenseam , quibus cum Turcarum Tyranno , acerrimo nostri nominis hoste , conflixit ? Numquid ex hominum memoria excidisse potuit formidolosum illud atque anxium Christianæ Reipublicæ tempus , quum Peloponneso jam tota in Turcarum potestatem redacta , Corcyra obseffa , ipsa jam Italia hostilium armorum strepitus audiret , ipsa hæc Romana Urbs , Religionis sedes , trepidaret , universa demum Europa victrices hostium copias pertimeret ? In tanta Ecclesiæ calamitate , in maximo Christianorum omnium periculo , ad quem potissimum ventum est , nisi ad Carolum Romanorum Regem , cujus perspecta pietas ac virtus communibus fortunis perfugio esset ? Ad eum igitur missæ litteræ , adornata Legatio , maximæ auctoritatis Legatus ex amplissimo Ec-

Ecclesiæ Senatu designatus. Verum non ille hujus adventum ; at quid dico adventum ? neque profectiorem exspectandam sibi esse duxit. Simul atque impendentia Religioni pericula, Christianis gentibus damna animo perspexit, ipsa ejus pietas, ipsa ejus virtus statim Italiæ, Europæ, Romæ ac Religioni opem tulit ; imminentes Urbium populationes, Ædium sacrarum direptiones, agrorum vastitatem, populorum stragem avertit ; bellum maximum & periculosum contra hostem potentissimum, ac recenti victoria elatum, in se suscepit, summa contentione gessit, ac mira felicitate confecit. Incredibiles profectò victorias ab eo reportatas, innumeras hostium copias profligatas atque deletas, munitissimas Civitates obsidione aut vi captas, Orbis admiratus est, eaque de causa sæpe hujus Urbis Tempia lætitiæ cantibus, & gratiarum actionibus personuere. Verum nunc minime ea quærimus, quæ a præpotentis Dei munificentia eximiæ pietatis præmia tulit. Illud ad institutæ orationis argumentum magis pertinet, quod sola pietatis & religionis causa ea bella ingressus est, quod Romano impellente Pontifice arma movit, quod obventas bellorum felicitates Deo acceptas tulit, quod erepta hostibus signa Templorum tholis suspendit, quod victoriæ fructum amplissimum duxit, Fidei Christianæ propagationem.

Quod si pro communi Christiani Orbis incolumitate tot curas suscipere, tot sumtus facere, tantum operæ ac laboris conferre non recusavit, qua benevolentia subditos populos, omnesque sibi arctioribus caritatis nexibus junctos complexum fuisse existimabimus ? Solida ac vera virtus ea demum censenda est, quam rectæ mentis consilium ordine ac ratione gubernat. Sed quum beneficia omnia ab illius humanitate erga omnium ordinum homines profecta nemo dicendo assequi possit, vos
ego

ego saltem ejus rei testes appello , quotquot principem Austriæ Urbem incolitis , quos teterrima grassante lue , reliquis procul aufugientibus , non modo nunquam deseruit ; sed , quamvis corrupta cœli temperie , inter mortuorum cumulos , atque ægrotantium turmas , in maximo vitæ periculo , versatus , omnem sollicitudinem , providentiam , liberalitatem eo contulit , ut vestras calamitates minueret ac sublevaret . Vos ego testor , fidissimi illius in varia fortuna comites , quos ea semper beneficentia prosequutus est , ut nunquam vos poenituerit , natale solum & patrias domos pro eo reliquisse : Vos , veterani milites , quos senio ac vulneribus confectos , amplissimis ædibus incredibili magnificentia excitationis excepit , atque aluit : Vos denique , infractarum ipsius legum contemptæque majestatis reos , vos , inquam , ipsos compello ; pro quorum salute ac vita non opus fuit Ecclesiæ Sacerdotes , ut olim , aulam adire , preces & lacrymas fundere ; quum præsentissimum vobis in ipsius mansuetudine & clementia præsidium inveneritis .

Jam vero , cui tam excelsum per Fidem animum , Caritate autem ferventem adeo fuisse vidimus , non eum etiam summa fortitudine & constantia præditum fuisse judicabimus ? Immo vero his ita claruit , ut proprium illi ac peculiare *CONSTANTIÆ* ac *FORTITUDINIS* insigne omnium consensu attributum fuerit . Eas nimirum virtutes semper in deliberando consuluit , eas in agendo sequutus est . Nulla unquam fuit tam aspera rerum facies , qua ita commoveri se passus sit , ut sibi , suæque virtuti ac dignitati , aut ullius demum generis officio deesset . His virtutibus præcipue fretus , adversos fortunæ casus fortiter tulit , quibus & sæpe alias , & extremis potissimum vitæ annis , (quo fortasse ad vitam hanc miseram libentius relinquendam compararetur ,) afflictus est .

Quique secundis successibus nunquam elatus fuit, idem conversionem rerum, commutato dumtaxat virtutis, ceu armorum, genere, pari æquitate animi excepit. Mirificæ porro illius fortitudini, qua filium unicum, in cuius vita Cæsareæ Familiæ spes, atque Europæ omnis tranquillitas recumbebat, immatura morte sublatum aspexit, & suam orbitatem semper æquo animo tulit, quæ potest par oratio inveniri? Quæ ego hic publicæ ac privatæ virtutis exempla, brevitati consulens, silentio prætereo?

Sed tota augusti principis virtus ex omni parte se ostendit in præclara obeunda morte; quam & sine perturbatione præsensit, & absque timore expectavit, & constantissime ac sanctissime occubuit. Vix ille salutem suam in aliquod discrimen adductam esse intellexit, quum se jam ad omnia promptum ac paratum esse, jam Divinæ voluntati acquiescere professus est. Mox ingravescente vi morbi, animæ primum, sua jam *in domum Domini profectione lætantis*, tum & publicis ditionum suarum, & privatis Augustæ Familiæ rebus tempestive ac tranquille consulens, omnibus religionis, pietatis, grati, ac liberalis animi officiis satisfecit. Ubi vero, inter acerrimos cruciatus, dissoluta pene jam corporis compage, certissima moriendi necessitas illi se obtulit, quosnam illi sensus mortis præsentia inspiravit, quænam illi verba dictavit? *Jam mihi*, ait, *perinde est, ac si de uno in aliud cubiculum migrandum foret. Graviores quidem sunt, quæ me post obitum manent: Sed* (crucifixi Servatoris imaginem tunc amplexus) *in hoc, inquit, confido. O fortem invictumque animum! o magnam, admirandamque constantiam! Vel potius, magnam illam quidem, nunc vero minus mirandam, quando firmissimum, quo nitebatur, fundamentum compertum est. Atque ille quidem hac animi fortitudine usque ad extremum*
spi-

spiritum sibi constans, sibi præsens, Deo fidens, *gloriam suam & honorem in beatam illam Hierusalem allaturus* abcessit: Nos autem miseros in sui desiderio, in luctu & squallore, in anxietate ac trepidatione reliquit.

At quid ego, qui invictam hucusque Principis constantiam ac fortitudinem commendavi, lamentari adhuc, atque animum despondere pergo? Quin potius, illius exemplo, hujusce casus acerbiter *de manu Dei* toleranter *suscipere*; de iis vero, quæ ventura sunt, *omnem sollicitudinem in Deum projicere*, & mihi & aliis suadeo? Hoc melius; hoc, inquam, faciendum censeo: Et quod initio fieri posse negavi, ut aliquam scilicet communi dolori consolationem adhiberem, nunc id aliquo pacto obtinere non desperabo. Quod enim ad pientissimi Imperatoris obitum attinet, vix hunc lugere nos decet, quem nonnisi gradum ei fuisse ad Regnum multo præstantius cum Rege Regum perpetuo obtinendum, merito confidimus. Quæ vero damna inde eventura esse veremur, iis plus æquo commoveri, paterna nos optimi Numinis providentia vetat: Sperandum est enim quod is, qui hoc ipso anno diuturnam Ecclesiæ viduitatem, religiosissimo, sapientissimo, optimo demum Pontifice in Petri Cathedra constituto, solatus est, idem in vacuum Imperii Romani solium, ad Christiani populi præsidium, ad Ecclesiæ tutelam ac patrocinium, principem virum omni genere laudis præstantem, concordibus Electorum suffragiis, quam citissime subrogabit.

F I N I S.

R O M Æ

Typis Bernabò, & Lazzarini, MDCCL.

SUPERIORUM PERMISSU.

72
192

